

Bráðabirgðaúrskurður Úrskurðarnefndar Pírata

20. ágúst 2016 í máli

nr. 8/2016

Úrskurðarorð

Kjördæmaráði Norðvesturkjördæmis er óheimilt að halda áfram eða ljúka ferli vegna prófkjörs Pírata í Norðvesturkjördæmi. Kjördæmaráði er jafnframt óheimilt að láta fara fram staðfestingarkosningu vegna framboðslistans.

Þessi úrskurður er til bráðabirgða og gildir þar til að Úrskurðarnefnd hefur úrskurðað í máli nr. 8/2016 (ágreiningur um framkvæmd prófkjörs í Norðvesturkjördæmi).

Úrskurðarnefnd veur athygli á því að úrskurðir Úrskurðarnefndar eru bindandi.

Málsmeðferð

Þann 18. ágúst 2016 barst Úrskurðarnefnd kæra vegna gruns um að frambjóðandi í prófkjöri Pírata á Norðvesturlandi hafi gerst brotlegur við prófkjörsreglur kjördæmaráðs Pírata á Norðvesturlandi. Nefndin hefur ákveðið að taka kærana til efnislegrar meðferðar og veita henni flýtimeðferð og málsnúmerið 8/2016.

Tveir af aðalmönnum úrskurðarnefndar Pírata, Olga Cilia og Þórhildur Sunna Ævarsdóttir, hafa lýst sig vanhæfar til að koma að máli nr. 8/2016. Varamaður í Úrskurðarráði, Gunnar Ingiberg Guðmundsson var þátttakandi í prófkjörinu á Norðvesturlandi. Aðalmenn úrskurðarnefndar úrskurðuðu hann því vanhæfan í málinu á grundvelli b-liðar greinar 5.1 í málsmeðferðarreglum Pírata. Herbert Snorrason, sem var einnig varamaður í nefndinni sagði sig úr nefndinni með tölvupósti þann 17. ágúst 2016.

Þar sem meirihluti aðalmanna nefndarinnar teljast vanhæf í málinu, og varamaður einnig, ákváðu aðalmenn Úrskurðarnefndar samhljóða að beita grein 3.6 í málsmeðferðarreglum nefndarinnar og skipa óháða aðila í nefndina, til meðferðar tiltekins máls. Skv. grein 3.7 í málsmeðferðarreglunum skal tryggja að hinir óháðu aðilar hafi góða þekkingu á íslenskum lögum sem og lögum Pírata. Á grundvelli þessarar greinar ákváðu aðalmenn úrskurðarnefndar,

Helgi Bergmann, Olga Margrét Cilia og Þórhildur Sunna Ævarsdóttir að skipa þá Birgi Steinarsson og Hafþór Sævarsson sem óháða aðila í Úrskurðarnefnd í máli nr. 8/2016.

Málsatvik

Prófkjör Pírata á Norðvesturlandi fór fram dagana 8-15. ágúst 2016. Skv. 9. gr. prófkjörreglna Kjördæmaráðs Pírata á Norðvesturlandi skal Kjördæmaráð fara yfir niðurstöður kosninganna með frambjóðendum og tekur við staðfestingu frambjóðenda um hvort þeir vilji halda því sæti sem þeir fengu, fella sig af lista eða lækka sig um sæti. Að því loknu þegar listinn hafi verið fullmannaður skuli hann verða sendur til samþykktar í opinni kosningu fyrir alla félagsmenn. Verði listinn felldur í opinni kosningu skuli prófkjörkosning endurtekin í opinni kosningu þar sem allir sem voru skráðir í Pírata 30 dögum áður en prófkjörkosning hófst geta tekið þátt.

Niðurstaða

Í ljósi þess að Úrskurðarnefnd hefur borist kæra vegna gruns um að frambjóðandi hafi brotið prófkjörreglur Pírata á Norðvesturlandi telur nefndin að það sé ótækt að Kjördæmaráð Norðvesturlands fari í það ferli að klára röðun á lista og halda staðfestingarkosningu um hann fyrr en niðurstaða er komin í mál nr. 8/2016. Því hefur Úrskurðarnefnd ákveðið að virkja grein 15.1 í málsmeðferðarreglum nefndarinnar, en þar segir að Úrskurðarnefnd geti beitt bráðabirgðaráðstöfunum til þess að stöðva framkvæmd máls ef að verulegir hagsmunir séu í húfi fyrir málsaðila eða félagið. Jafnframt segir í grein 15.2 í sömu reglum að við slíkar aðstæður gefi nefndin út sérstakan úrskurð sem geti stöðvað framgang mála eða beint þeim tímabundið í ákveðinn farveg til bráðabirgða.

Þegar að miklir hagsmunir eru í húfi fyrir Pírata er ótækt að Kjördæmaráð sem starfar á grundvelli laga Pírata geti haldið áfram með framkvæmd prófkjors á grundvelli kosninganiðurstaðna sem álitamál er um hvort voru lögmætar.

Á grundvelli þess að mál nr. 8/2016 og niðurstaða þess er mjög mikilvæg fyrir Pírata í heild, og með tilliti til þess að mál nr. 8/2016 hefur fengið mestu mögulegu flýtimeðferð, telur Úrskurðarnefnd að réttmætt sé að beita bráðabirgðaráðstöfun sbr. grein 15.1 í málsmeðferðarreglum Úrskurðarnefndar, gagnvart frekari aðgerðum Kjördæmaráðs Pírata á Norðvesturlandi, þangað til að niðurstaða er fengin í máli nr. 8/2016. Er það því niðurstaða

Úrskurðarnefndar að ferli prófkjörs í Norðvesturkjördæmi skuli stöðvað þangað til að niðurstaða Úrskurðarnefndar í máli nr. 8/2016 liggur fyrir. Er því Kjördæmaráði Norðvesturlands jafnframt óheimilt að láta fara fram staðfestingarkosningu á lista vegna prófkjörs sem haldið var í Norðvesturkjördæmi þangað til niðurstaða liggur fyrir í máli nr. 8/2016.

Úrskurðarorð

Kjördæmaráði Norðvesturkjördæmis er óheimilt að halda áfram eða ljúka ferli vegna prófkjörs Pírata í Norðvesturkjördæmi. Kjördæmaráði er jafnframt óheimilt að láta fara fram staðfestingarkosningu vegna framboðslistans.

Þessi úrskurður er til bráðabirgða og gildir þar til að Úrskurðarnefnd hefur úrskurðað í máli nr. 8/2016 (ágreiningur um framkvæmd prófkjörs í Norðvesturkjördæmi).

Úrskurðarnefnd vekur athygli á því að úrskurðir Úrskurðarnefndar eru bindandi.

Úrskurðarnefnd Pírata

Birgir Steinarsson

Hafþór Sævarsson

Helgi Bergmann